

Monday, April 21, 2025

Time - 2:30pm - 2:35pm

REGIONAL NEWS BULLETIN

(MIDDAY)

GOVERNOR : SOLDIERATHON

Larsap, General (Rtd) Vijay Kumar Singh chuan nimin khan 'AHRR Delhi Soldierathon 2025 - Run with Soldiers and Run for Soldiers' tih thupui hmanga buatsaih chu Army Hospital Research & Referral, Delhi-ah Khuallian niin a telpui a, Soldierathon-a tel mi 4,000 bawr velte chu a vailiam.

He marathon hi 'Fitistan - Ek Fit Bharat' te buatsaih niin, sipai hliam tuarte enkawlina hmun, Paraplegic Rehabilitation Center, Kirkee, Pune tanpui nana ruahman a ni.

Larsap chuan Soldierathon buatsaihah a tam thei ang ber an tel ngei theih nana hmalak a nih thu sawiin, hemi kaltlang hian mipuite pawh sipai rualin an tlan theih bakah, taksa sawi zawi nana tlan pawimawhna zirtir pah tum a nih thu a sawi a. Soldierathon-ah mi 4,000 bawr vel an inziahluh thu a sawi bawk.

Soldierathon hian ram tana martarte leh hliampui tuarte chawimawi a tum a. Ram pumah ram tana nunna hlu tak hlantute ngaihhlutna, abikin thalaite'n an chin deuh deuh theih nana hmalak chu ngaihpawimawh a ni a. Chhum lo chat lova ram venhim hna thawktu, inpumkhatna leh ram inrelbawlina vawnhim kawnga hmalatu sipaite chhuanna thinlung mipuiteah tuh a tum a ni.



GINGER

Mizoram sorkar chuan vawiin atangin a thawh hnihna atan sawhthing a lei tan.

Mizoram Agricultural Marketing Board Managing Director, Pu Lalhmingmuana chuan Akashvani zawhna chhangin, vawiin atanga a thawh hnihna atana sawhthing an lei dan tur chu a thawh khatna nen a inang lo tih sawiin, a thawh khatnaa sawhthing leitu tur an hmuh hmaa loneituten sawhthing an lo cho lawk ang kha tun tumah chuan an kalpui tawh dawn lo a ti a, vawiin atanga sawhthing lei thawh hnihna an kalpui tur chu ruahmanna awmze nei zawka kalpui an tum tawh thu sawiin, a thawh hnihnaah hian Mizoram pumah sawhthing dahna tur, secondary collection centre, SCC 62 an siam tih sawiin, heng atang hian vawi lehkhata an lei huk tawh dawn lova, sawhthing lei thawh khatna a an la lei ve lohna khua te an ngaipawimawh dawn tih a sawi a ni.

MAMB Managing Director chuan Marketing board chuan Mizoram sorkar sum tam tak hum zawnga sawhthing lei an tum tih sawiin, tun dinhmunah sawhthing leikhawm sa te chu man to zawka hralh vek an tum a ti a, Tun dinhmunah India-ah sawhthing man a san loh avangin Mizoram chu hmun hla leh kalpawh harsa a nih avangin sawhthing lei tur ten an pan hnuhnun ber a nih thin avangin sawhthing man chu a sang thei lo tih a sawi bawk.



ASPEE LM PATEL FARMER AWARD

Kum tina ramchhunga kuthnathawk tithate leh midang te entawwna tura hmala te chawimawina chu Pi Lalrinpuui, Saikhamakawn ami in a dawng.

Aspee L.M Patel Farmer of the Year Award Pi Lalrinpuui'n a dawn theihna chhan hi chuktuah huan tha taka a enkawl avang leh kutkawih eizawwna hmanga midangte zirtirna leh hmalak dan tur ngaihtuah sak vang a ni a, Farmer of the Year Award hi huang thumah then niin Pi Lalrinpuui hian Woman Farmer Category - 2022 atan - An Enterprising Woman Farmer in Vegetable Cultivation from North East Region lawmman a dawng a, Lawmman hi Lok Sabha MP Pu Shashank Mani Tripathi-a'n a hlan a ni.

Pi Lalrinpuui hi kum 2018 atangin Horticulture Department hnuaiah training neiin, off season tomato a ching tan a, chuta tang chuan hlawhtling chho zelin lawmman chi hrang hrang - Best State Farmer Award 2020-21, Best Horticulture Farmer Award (Aizawl district) 2022, District Millionaire Farmer of India Award 2023 te hi a lo dawng tawh a, tun tuma he award dawng tur hian Horticulture Department in hmalak puin, a nominate a. Award dawng tur hi India ram puma kuthnathawk tithate atanga thlan thin a ni a. Uluk taka endik niin, Preliminary stage zawhah nomination scrutiny paltlang lehin Mumbai atangin a hmun ngeiah anmahnirawn kalin, kawng hrang hranga a hmalak dante enfiah a nih hnuaiah committee vawili paltlang lehin award dawng thei tur hian thlan a ni ta a ni.

He award hi Aspee Agricultural Research and Development Foundation, Mumbai in kumtin a hlan thin a, Covid-19 hnua an sem leh hmasak ber a ni. India ram puma kuthnathawk tithate chawimawi nana buatsaih a ni.



MAL BOOK OF THE YEAR

Mizo Academy of Letters Book of the Year 2024 atan Hun Inher Kara Zofate tih F. Vanlalrochana ziah chu thlan a ni.

Mizo Academy of Letters chuan nikum 2024 chhunga Mizotawng a lehkhahu chhuak 215 zinga lehkhahu tha ber, Book of the Year 2024 atan Pu F. Vanlalrochana ziah 'Hun Inher Kara Zofate' tih chu vawiin khan a thlang a, Book of the Year 2024 lawmman hi naktip, April ni 23 khian I&PR Auditorium-a MAL Foundation Day lawmnaah hlan a ni ang.

Health Minister Pi Lalrinpuui chuan a social media account kaltlangin Mizo Academy of Letters in kum 2024 chhunga Mizo tawng a lehkhahu chhuak 215 zing atangin Mizo tawng a chhuak lehkhahu tha ber Book of the Year 2024 atan 'Hun Inher Kara Zofate tih F. Vanlalrochana ziah a thlang chu thinlung taka a lawmpui thu a sawi a. Ram rawngbawlnaah zia mite an pawimawh thu leh hnam lungphum pawimawh tak an nih thu sawiin, Pu F Vanlalrochana leh zia mi dangte chu zia zel turin duhsakna a hlan nghal a ni.

MAL hian kum 2024 chhunga Mizotawng lehkhahu chhuak 215 atanga tha zual, top 20, top 10 leh top 3-Hun Inher Kara Zofate - F. Vanlalrochana, Ka Hringnun Lehkaphak (An Autobiography)- Lalfak Zuala leh Par Har 2-Dikte Hnamte te chu a lo thlang chhuak tawh baw a ni.



POPE FRANCIS DIES AT 88

Pope Francis chu vawiin khan kum 88 mi niin a thi.

Pope Francis thih thu hi vawiin khan Vatican chuan puang chhuakin kum 12 chhung natna hrang hrang alo neih tawh thu an sawi a, kum 88 mi niin Pope Francis hi a chenna Vatican’s Casa Santa Marta ah a thi a ni.

